

DISSERTATIO INAUGURALIS MEDICA,
DE

HYDROPE ASCITE,

QUAM

RECTORE MAGNIFICENTISSIMO,
SERENISSIMO PRINCIPE AC DOMINO,

DOMINO CAROLO,
PRINCIPE PORUSSIAE, MARCHIONE BRAN-
DENBURGICO, CETERA,
PRÆSIDE

D. FRIDERICO HOFFMANNO,
COLLEGII MEDICI h. e. DECANO,
PRO DOCTORIS GRADU
OBTINENDO,

Publico Eruditorum examini submittet
AUCTOR RESPONDENS

JOHANNES JACOBUS WEISE,
BEROLINENSIS - MARCHICUS.

D. Junii MDCCXVIII. Horis, locoque consuetis.

HALAE MAGDEBURGICAE,
Typis CHRISTIANI HENCKELII, Acad. Typ.

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N.Y.

1897

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N.Y.

1897

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N.Y.

1897



DE
HYDROPE ASCITE.

PROOEMIUM.



Aud facile graviores

in cursu studiorum meorum mihi deprehendere licuit errores, quam qui ex sequenti scaturigine promanarunt. Inveniuntur nimirum, qui hypothesin ex proprio ingenio confingunt, eamque

pro certa habent, posteaque ex ea rationem phaenomenorum reddere satagunt. Quod si cum plurimis modo bene procedat, rem feliciter se confecisse, & scientiæ nomen huic suo inde exstructo Systemati imponi posse putant. Et hæc videtur plerorumquæ ferè unica fuisse norma, quam in procudendis novis Systematibus sequi se quam tutissime posse existimant.

Imputant hunc errorem communiter Nobilissimo Cartesio, quasi ille primus suo exemplo hunc perniciosissimum philosophandi modum docuerit. Verum enim vero mihi videntur hac chorda oberrare omnes veteres physici, Aristotelici præcipue, quibus nil familiarius, quam abstractionibus suis in explicanda rerum natura abuti; Imo Medici veteres fere omnes in hoc luto hæserunt. Horum hic possem texere seriem numerosissimam, nisi plane alienum a proposito meo foret. Fatendum tamen prælaudatum Cartesium vitam quasi reddidisse huic modo philosophandi, consepulto quodammodo per methodum experimentalem a Cl. Verulamio aliisque in philosophiam naturalem introductam.

Ast, cum ex eo, quod plurima phænomena ex hypothesis aliqua explicari queant, ejus possibilitas, non vero certa veritas elucescat; (unius enim rei plures possunt esse causæ) cumque facile seducantur auctores, ad corrumpendam mutilandamve rei historiam, ut salvent hypothesis; possit etiam hypothesis vera esse, quanquam nondum modus pateat, quò omnia phænomena ex ea resolvi queant, ut cætera taceam incommoda: facile apparebit, periculi plenissimum hunc esse modum inveniendi veritatem.

Melius igitur ii sibi prospiciunt, qui non in alterius nec in unius jurantes verba magistri prius ex attenta observatione phænomena omnia solícite colligunt, deinde singula seorsim perpendunt, ac denique ex eorum inter se comparatione rationem eorum phænomenorum

rum reddere intendunt; quæ enim ita inveniri nequeunt, certe incognita manebunt.

Hanc semitam & ego ingressus sum in consideratione Thematis, quod SPECIMINIS INAUGURALIS loco elaborare suscepi de HYDROPE ASCITE; Ita enim quam tutissime veram adfectus nostri indolem explorari posse nobis visum fuit. Si tamen alicubi errasse deprehendamus, veniam apud æquos Lectores facile nos impetraturos speramus, dummodo perpendere velint, hæc non pro materiæ ipsius amplitudine & dignitate fuisse pertractata, sed pro ingenii nostri modulo, cujus aliquod specimen hic dare, & primam quasi foeturam excludere in animo habuimus.

Cum argumentum valde compositum præ manibus habeamus, dispertiemur melioris ordinis causa Tractationem nostram: ita ut primo, præmissa definitione nominali, Historiam ponamus, si non omni, maxima tamen ex parte completam; ab hac progrediamur ad Causas; dein ad Signa; iis denique tanquam principiis, & justis præsuppositis in enucleanda Therapia insistamus.

Faxit Deus O. M. ut veritatem, quantum licet in hac rerum humanarum caligine, assequamur, & hæc nostra molimina omniaque studia nostra in sui Nominis Gloriam, commodum proximi, nostramque salutem cedant.

Thesis I.

INter varia & mira morborum genera, quibus cum humanum nostrum corpus quotidie conflictari debet, scēpius quoque nostræ sanitati infestissimus se prodit ille hostis, *Hydrops* vocatus, qui variis omnino machinationibus aggreditur nostram machinam eaque obsessa varias in ea ludit Tragœdias, miro modo medentium operas illudens. Nulla enim propemodum pars nostri corporis est, quam non obsedisſe aliquando observatores memorant, sic, ut meritò in classem adfectuum generalium, qualis sunt Inflammatio, Scirrhus &c. referri mereatur.

II.

Non libet hic terere aures inutili transcriptione illa *Etymologiæ* hujus nominis; Ut autem quivis statim intelligat, quid nobis eodem veniat, non supervacaneum puto, *Descriptionem* hujus morbi brevem nostræ Tractationi præfigere: *Est nempe Tumor p. n. vel totius nostri corporis, vel quarumcunque ejus partium mollis, albus ab aqua vel aëre distendente procreatus.* Albô enim colore a quôcunque tumore inflammatoriô, a scirrhuso vero molli adtactu distingvitur.

III.

Nobis non proposuimus omnes hujus adfectus percurrere classes, sed ad evitandam omnem prolixitatem inter species hujus morbi principales, quarum tres ab auctioribus recensentur, *Anasarca, Tympanites, Ascites*, ultimam hanc maximo omnium suffragio, inter cœteras

teras dirissimam elegimus, omnia, quæ de Hydrope in genere dicturi sumus, ad hanc in speciè applicaturi.

IV.

Est autem *Ascites*, ut hujus quoque nominis rationem reddamus *Tumor p. n. abdominis ab aqua distendente generatus*. Quod eum Tumorem abdominis nominavimus, in eo distinguitur a reliquis hydropis speciebus capitis, thoracis &c. maximè ab *Anasarca*, quæ non abdomen tantum, sed totum corpus obsidet. Ab aqua eum generari diximus, a potiori facta denominatione, hâc enim formali ratione a Tympanitide differt, in qua abdomen a flatu imprimis distenditur. Reliquas differentias suo trademus loco.

V.

Nolumus paginas implere variarum hujus vocis acceptionum commemoratione, Criticorum potius judicio committenda, cum præcipue res sit ad hujus seculi palatum fastidii plenissima. Ad utiliora magis nos conferemus, ipsius nempe indolis hujus morbi accuratorem, quantum a nobis fieri poterit, evolutionem.

VI.

Primum, quod observatur in ægris hoc morbo detentis, est *Tumor pedum*, qui plerumque portam aperire reliquis funestissimis malis solet. Communis fere omni Hydropi. Asciti tamen imprimis familiaris, quam nec hunc semper præcedere soleat. Etiam si vero non semper in initio adsit, morbo tamen confirmato non abest, tum autem pejoris ordinariò indolis observatur

tur teste Cl. *Baglivo* *Diff. varii argum. p. m. 71.* Incipit enim ex experientia *Avi mei* *Ἰσχυράκις* nonnunquam etiam in ventre vel scroto, ita ut præcedat Hydrocele (quæ alias in fine plerumque supervenit) idem quoque contingit, quando a Tympanitide incipit. Exferit se Tumor circa malleolos imprimis & talum, qui magis auctus, suras quoque & crura occupat, imminuitur corpore magis declivi, ægro noctu in lecto decumbente, interdum vero, cum corpus erigitur & ægri sedent vel ambulant, ad pristinam amplitudinem redit.

VII.

Huic, si per congruas medicationes non tollatur, (nam facile per duas tresve septimanas œdema durare potest, imò annos, non statim subsequente Ascite, si nimirum id medicamentis & congruo vitæ genere in statu suo conservetur) succedit Tumor & inflatio abdominis circa inguina incipiens, & successu temporis ad scrobiculum usque pertingens. Imo quandoque thoracem occupat; faciem & manus, sic ut universalis inde Hydrops oriatur. Tanta vero amplitudine hæc distensio esse solet ut ægri ipsi ne quidē pedes suos cernere præ propēdente abdomine possint. Augetur hic Tumor nunc sensim & vix animadvertentibus id ægris, nunc subito tanta irruit aquarum distendentium vis, ut ab ipsius abdominis ruptura omni momento sibi metuant ægri.

VIII.

Ab impresso tumori digito fovea aliquandiu remanet, nonnunquam tamen durus est & renitens, imprimis, quando a Tympanitide incepit, vel in sua *αὐτῇ* con-

constitutus, ubi aquæ ab impressione digiti recedendi nullus amplius relictus est locus. Splendet tum cutis, quæ sic nimium distenta lævior evadit & politior.

IX.

Comitatur eundem *lassitudo* quædam & *gravitas* omnium artuum, præcipue inferiorum, qui pondere suo corpus reliquum ad humum semper deprimunt.

X.

Fluctuationes in infimo ventre percipiunt ægri, si corpus in latus alterutrum movent, quod tamen haud in omnibus observatur, quanquam in quibus tales volutationes de latere in latus audiuntur, de morbo mentem non sinunt amplius esse dubiam. In morbo enim inveterato, & in quibus aqua suis cistis peculiaribus continetur, uti inferius dicemus, minimè talis motus de loco in locum contingere potest.

XI.

Dolore quoque *tensivo* nunc in dextro nunc in sinistro hypochondrio adficiuntur, cui quandoque accedit insignis *pruritus* in partibus pedum membranosis, imprimis plantis, quæ acri ac rodente madore aliquando irrorantur. Nonnulli maximos *cruciatos* in femore percipiunt, ac si secarentur vel urerentur, ut voce quoque altâ clamare cogantur; nonnullis inde *ulcera* crurum & *abscessus* oriuntur, ordinario tamen eventu funesto. Mali enim solent esse moris & difficulter ob serum continuo adfluens & magis sua acredine partes rodens, consolidantur. Nonnunquam *maculæ fuscae* & lividæ in illis tummentibus partibus apparent.

XII.

In nonnullis *penem* inflari *cum scroto*, adeo ut hoc ad capitis magnitudinem excrescat nonnunquam, observatum fuit. Retrahitur quoque præputium, sicut foeda miétione faciem sibi maculent. Maximam istam virgæ unà & scroti intumescientiam observavit *Avus meus b. m.* in futore hydropico, adeo, ut glans seu balanus contabesceret ad digitum minoris crassitiem, & in totum retorqueretur, ut cum summa urinandi difficultate se ipsum æger commingeret. In fœminis *Labia uterina* intumescunt, uteri quoque prominentiam iis accidisse memorant inter alios & *Acta Hassniensia* T. 2. p. m. 139.

XIII.

Quibus sic constitutis *superiora* magis magisque contabescere solent, quo magis Tumor in inferioribus & ipso ventre increscit. Aliter tamen se res utique habet, si hydrops pectoris origo fuerit morbi, vel anasarca juncta sit. *Faciei color* quoque solet esse *fædus* ex virore albicans, vel ad citrinum & plumbeum declinans. Neque tamen negandum, multos asciticos sic satis vivido esse colore, teste *Argenterio* in Comm. §. II. l. 4. Observavit quoque *Avus b. m. obs. msst.* in ascitico quodam floridum faciei & totius cutis in corpore colorem ad finem usque vitæ permanfisse; Corpus etiam hujus viri parum absumptum, sed pingue satis & boni habitus fuit.

XIV.

Pulsus ut plurimum mollis, undosus & frequens est, nonnullis subdurus & parvus, indicium *febriculae*,
quæ

quæ comitari hunc morbum plerumque solet; est vero hæc *continua*, *lenta*, circa vespëram intolerabilior, tam parva quandoque, ut vix sensibus obvia sit. Interdum satis vehemens esse solet, quâdo sc. morbis acutis, viscerum inflammationibus hydrops supervenit, & tunc etiam pulsus pro ratione febris solet esse vehementior.

XV.

Haud parum quoque discruciantur ægri *Dyspnæa*, quæ omni hydropis speciei familiaris est, gravissima tamen in asciticis. Accedit plerumque, cum tumor abdomen totum occupans thoracem petit, quandoque tamen tumorem præcedit, eumque cæteris paribus ut plurimum præsagit. Exacerbatur post motum corporis vehementiorem, & noctu ob situm corporis declivem, abdominalisque aquæ adscensum, quare magis erecto corpore sedere, quam decumbere cupiunt, imprimis quando hoc symptoma cum ipso morbo eundo majores vires acquirit. Plane non ferunt totius corporis decubitus; si enim hoc aliquando tentant, manifestum incurrunt suffocationis periculum, sic ut mox corpus erigere cogantur, atque cum insigni levamine plerumque tunc melius respirent. Est tamen & ille corporis erecti in sella situs iis haud parum molestus, mire enim corpus inde defatigari & exhausti vires sentiunt, quarum defectus, si in ullo morbo, certe in hoc funestum post se trahit exitum.

XVI.

Semper etiam *Flatibus* vexantur ascitici, ideo non mi-

randum, si tympanitis huic adfectui jungatur, has enim duas species Hydropis invicem permisceri expertus est *avus in Obsf. mssis* Cap. de Hydrope, cujus propria hæc sunt verba: „Nullus in progressu seu statu morbi (a quo tempore denominandi sunt) est ascites, „nulla tympanites, in quibus, hic quidem simpliciter „flatus, ibi vero solum serum accusandum sit permanenter & toto morbi decursu: sed semper ex prædominante fit appellatio; si flatus sunt plures, refertur „hydrops ad tympanitidem; si serum exsuperet, ad „asciten. Et de tympanitide omnes practici consentiunt, de ascite autem qui dubitat, consulat experientiam; Semper enim unà flatibus abundant.

XVII.

Accedit his, idque in fine magis morbi, *Tussis* arida secundum *Hippocr. Lib. prænot. & Coac. §. 452*. Quæ quò siccior, eo plerumque solet esse peior, quicquid enim virium corporis a sævitia præcedentium symptomatum reliquum & intactum mansit, hic plerumque cum ipsius ægri vitâ interire consuevit.

XVIII.

Ad res dictas non n. les quod attinet, & quidem primò Cibum & Potum, magis hujus quam illius excessus observatur. *Appetitus* enim ab initio morbi per totum ejus decursum plane prostratus esse solet, sic ut nonnulli quoque a ciborum adspectu abhorreant. Videntur, inquit *Hipp.* vel quisquis est *Autor. lib. de int. adfect.* alimenta cucumerem agrestem olere præ averfatione a cibo. Nonnullos tamen bene appetere & com-

medere, *Avus b. m.* observavit. *Sitis* vero urget assidua, secundum illud Ovid. lib. Trist.

*Quibus intumuit suffusâ venter ab undâ,
Quo plus sunt potæ, plus sitiuntur aquæ.*

Hanc p. n.lem sitim, quam plerique pro diagnostico hujus morbi signo adferunt, abfuisse observavit *avus b. m.* in eod. ægro §. 13. allegato, qui alias satis bibulus fuerat ad crapulam usque. Ordinario tamen solet adesse, & quandoque sic augeri, ut observatum fit, ægros suam urinam bibisse alio potu destitutos, & malagmata sua devorasse teste *Celso lib. 3. c. 21. p. m. 161.*

XIX.

Quidam multum *vigilant*, imprimis juvenes atque quibus nondum a prægresso morbo exhaustæ sunt vires, ubi quoque febris plerumque intensior solet esse. Senes vero morbo confirmato *somnolenti* sunt, in speciem eorum, qui Lethargô adficiuntur.

XX.

Alvus plerumque *adstricta* nonnullis, raro tamen laxa, qualem *Avus b. m.* in ascitico quodam simul anasarca laborante invenit. Fæces v. albidæ, colore suo flavo virescente naturali destitutæ. Quibusdam accidit *Dyarrhœa* eaque serosa, quæ si inter initia morbi incidat, eunt plerumque solvit, si vero ipso morbo jam aucto superveniat, signum lethiferum præbet. Sentiunt tum ægri in nimio isto alvi profluvio sensum morsicantem & vellicantem intestina. *Menses* rite solent fluere, nisi quando ab aliis causis impeditæ fuere morbo jam instituto, vel ante ejus generationem, quando nimirum ab earum suppressione dependet.

XXI.

Urina ad mensuram eorum, quæ assumuntur ex liquidis, *pauca, crassa*, & in asciticis præcipue cum copioso subinde *sedimento rubro*, lateritio emittitur; quibusdam *tenuis* fluit, *alba* instar aquæ, incocta. Mittitur haud raro cum insigni inter fluxum ardore & stranguria, certo ac redinis, si saporem jungas, testimonio. Visa quandoque crocea, quæ cum adsit, hunc hydropis statum desperatum pronunciant autores, imprimis si febricula simul adsit continua. Aqueus color, quocunque aliò durante tumore, semper optimus habetur. Observandum tamen hic est, hanc urinæ imminutionem non semper huic morbo adesse, nec omni tempore uti ex *avi b. m.* observatione didici, cujus propria verba ex mssto sup. cit. hic apponam. „In principio fere respondet potui urinæ, quatenus ea proportio in naturâ locum habet; in fine, vero minuitur *urina* maximè, ubi tamen *hydrops* jam est generatus & in sua *ἀκμῇ* quasi. Observavit quoque „urinam imprimis fuisse rubram cum magnò *sedimentò* „rubrò partim fuscò & atrò in medio, quo ad dimidium „semper replebatur *urinale*, quando hic morbus ex *Ικτε-* „*ρο* natus fuerat.

XXII.

Urinam, si fluat, morbo *nondum confirmato*, semper levasse ægrum observatum est, quandoque tamen ista excretio mortis nuncius esse solet, si viribus solutis contingat, atque copiosissima sit. Ad hanc morbi per urinam solutionem pertinet quoque sæpius apud autores medicos repetita observatio *Wieri* de pulvere bufonum, cui-
dam

dam mala quidem intentione, optimo vero eventu exhibitio, convaluit enim a morbo, subsecuta maxima urinæ excretionem.

XXIII.

Plurimi quoque *Diarrhæa* sponte superveniente cum sanitate redierunt in gratiam, cui quoque adstipulatur *Hippocr.* S.6. aph.14. *Hydrope detento* si aqua e venis in ventrem confluerit, solvitur morbus. Exemplum vero, ubi morbo consummato accedens mortem intulit, habet *Welschius* Curat.4. Dec.7. conf. §. 20.

XXIV.

Ad *sudorem* rarissimè proclives sunt, hinc illa solutio morbi rarius quoque contingit; quandoque quidem corpus humore quodam madidum habere solent, cum sensu frigiditatis ac horripilatione febrili: nunquam tamen hoc cum *euphorîâ* ægri contingit; potius observârunt, quod quando ad sudorem per artificia, balnea imprimis, coacti fuerunt, accedente apoplexia, mortem oppetierint; sed nec in balneis quidem sudore semper madescere inquit *Aretæus* l. 2. diut. c. 1.

XXV.

Meliusculè longè habent â *vomitum*, a quo multum levaminis sentiunt. Imprimis *Dyspnœa*, qua ordinariè anguntur per §. 15. solet a sua atrocitate remittere. Ipsum quoque morbum aliquando e medio sustulit opportunè inter initia accedens vomendi conatus; sic *Forestus* obs. 32. l. 19. *hydropicum* pro desperato habitum refert, qui navim conscendens provocato vomitu, post vomitum exercitio, integrè curatus fuit.

XXVI.

XXVI.

Casu sæpius hic morbus profligatus ex vulnere in scroto vel crure accepto, per quod aqua paulatim effluxit; exempla videri possunt apud *Schenckium* obs. medic. p. m. 481. 482. & seqq. *Zacutum Lusitanum* de princip. med. hist. l. 2. obs. 23. p. m. 405. Mirum est, quod *Hildanus* refert Cent. 1. obs. 48. de quodam ascitico, cui scrotum gangræna correptum decidit, testiculi sic denudati, callo rursus naturæ beneficio obducti fuere & æger postea diu sanus superstes fuit. Huc quoque spectant reliquæ hujus morbi solutiones paulo tamen rariores, quæ *Schenckius* l. c. ex Solenandro adduxit, de spontanea abdominis apertione, ex quâ postea vesiculæ plures aqua plenæ extractæ fuerunt. Huc refer *Obs. River.* comm. is. it. ex *Vido Vidio* de vesicula in umbilico orta, aquosum humorem fundente, cum ægri restitutione in integrum v. plura si placet ap. eund. l. c. Vesiculæ nonnunquam per alvum excretæ fuerunt, exempla leguntur apud *River. Cent.* 3. obs. 27.

Diuturna quoque abstinencia sine medicamentis, ægros restitutos fuisse, observatores memorant. v. *Schenck* l. c. p. m. 479. 480. *Hildan.* Cent. 4. obs. 41.

XXVII.

Supervenit nonnunquam *Hydrocele* & *Exomphalos* seu protuberantia umbilici. v. *obs.* *Hildan.* quibusdam *Epilepsia* accidit cum ingenti periculo, teste *Hippocr.* Coac §. 454. *Duretus* in Comm. in h. l. p. m. 200. observavit ejusmodi *Epilepsiam* interdum in apoplexiam mortiferam & insanabilem verti. Singulare tamen exemplum nobis servavit

vit *Ballonius* l. i. epidem. cujusdam hydropici, qui epilepsia accedente, abscessu in testiculis & femore facto ab utroque malo fuit liberatus. Quandoque suffocati moriuntur post alvi fluxum diuturnum biliosum vel copiosum teste *Hipp. 5. aph. 28.*

XXVIII.

Iunguntur asciti anasarca, præsertim in fine v. §. 7. tympanitis magis in initio v. §. 16. quandoque etiam alii morbi, v. g. paralyfis v. *Poter. obs. 5. cent. 1. Cur. 97. Palpit. cordis v. Solenandr. Conf. 9. S. 3. Asthma v. Trincavell. l. 3. conf. 34. Icterus v. Tulp. obs. medicar. l. 2. c. 36. &c.*

XXIX.

Duratio hujus morbi variat quidem pro diversa conditione causæ, symptomatum, temperantiâ ægri, atque ipsâ medelâ; citius tamen hoc morbo juvenes præ senibus occubuisse observatum est, aliàs diu ægros tenet suspensos intra spem metumque integræ sanitatis vel mortis. Frequentius ad *sex menses* producit, quandoque *integros annos* superat, medicamentis idoneis nonnihil allevatus. Qui eo morbo succumbunt, plerumque *tempore æquinoctiali* moriuntur; recedere quandoque subito videtur, pessimum tamen hoc signum est, plerumque enim & quidem haud impune de novo ægros invadit, quem atrociores postea experiuntur, morte presso pede sequente. Non rarò imprimis diuturnior hic morbus suas patitur *periodos*, observatum enim, in plenilunio omnia in hydropicis exasperari conf. *Bagliv. lib. de fib. motrice.*

XXX.

Residivæ huic morbo haud rarò contingunt, imprimis post medicamenta, effectum quidem, sed fomitem totius mali non tollentia, vel quod hic tolli nequeat, vel quod æger a medico eundem ignorante tractatus sit. Quandoque etiam ex errore ægri, qui post morbum profligatum nondum roboratis visceribus genio magis, quam par est, indulget, ac intemperantius vivit. Sin autem curatus hydrops redeat, ut plurimum *συνάποδνίςκει*, ita Hippocr. in Coac. aph. 460. S. 2. in Foës. Edit. *Aqua inter cutem, quæ curationi cessit, ubi recurrit, spem tollit. Cui non male Foësius in nota subjungit: Causa enim pertinax censetur & vitalium partium magna corruptio.* „Sic „Avus b. m. in obs. msst. exemplum habet mulieris a- „sciticæ, quæ ter ab ipso curata fuit, primo medica- „mentis convenientibus: postea casu disrupto umbili- „co, ita ut una vice aquæ plus minus 24. libræ profilie- „rint; a quo casu convaluit, & per semestre ferè bene „habuit. Sed semper negligens epatica medicamenta „tertia vice hunc in morbum incidit & mortua est.

XXXI.

Atque ita initium, progressum, & exitum hujus morbi sufficienter, uti speramus, delineavimus. Progre-
dimur ad ea, quæ anatome post mortem nobis de sede & causis hujus mali revelat, pressius tamen hæc prosequemur, quia jam in utilissimo opere, cui Sepulchreti nomen indidit, laboriosissimus ac Cl. Bonnetus hæc omnia fusius collegit; sufficiat nobis tantum ea exempla ad capita quædam relata paucis hic recensuisse, quo

eo tutius postea ad ipsas causas progredi queamus. *Tria* vero in hoc morbo nuda historica relatione ex ipsis incisis cadaveribus *innotescere possunt* (1) aquæ natura (2) locus eandem continens & (3) viscerum internorum constitutio.

XXXII.

Quod ad *primum* igitur (§. 31. n. 1.) attinet, *liquidum* (1) ratione *coloris* flavum, citrinum, urinæ simile, luteum aliquando, quandoque viride, sæpè loturæ carniū simile observatum fuit, interdum cruentum, plane nigrum apparuit, nonnunquam plane limpidum & crystallinum aquæ instar; sic lympham naturalis coloris nec foetidam ad 60 circiter libras in hydropico reperiit *Bagliv. Diff. var. arg. p. 73.* (2.) *Foetet* nonnunquam, quandoque sine odore insigni est. *Rodius obs. 8. Cent. 3.* halitum pueri hydropici sulphuris odore nares ferisse observavit. (3) *Sapore* acidum est, atque sensibili acredine salsa linguam irritans, hinc in *Act. Hassniens. vol. 4. obs. 69.* *Borrichius* lactis balneum coagulatum vidit a sudore foeminæ hydropicæ. (4) *Consistentia* nonnunquam valde dilutum aquæ instar est, spissiusculum tamen ut plurimum, igni impositum in gelatinam concret. *Barbett. in Praxi p. 169.* in foeminæ cujusdam hydropicæ abdomine primo tenuem lympham, postea gelatinam, deinde concretam, tandem duram & steatomaticam invenit. Cui adsentitur *Willisus pharm. rat. p. 2. p. m. 156.* qui serum hoc ovi albuminis in modum calore foci inspissari testatur. Variant tamen hæc omnino in diversis ægris; prout nunc recens effusum, nunc diu stagnans,

nunc urina, nunc lymphæ, nunc serum, pus &c. est. Et ex his modo singula seorsim reperiuntur, modo conjuncta novum aliquod compositum formant; non unius enim indolis hoc esse satis ex supradictis, uti confido, apparebit. *Quantitas* diversa esse solet pro corporis amplitudine & morbi diuturnitate; ita, ut quandoque 30, quandoque 40, 60, 90, quandoque centum libræ inventæ fuerint, imo ultra 100 libras in abdomine contentas fuisse *avus b. m.* in msst. obs. refert.

XXXIII.

Continetur vero secundo illa aqua plerumque quidem §. 31. n. 2. 1.) in cavo abdominis inter peritonæum & viscera, nonnunquam etiam 2.) inter peritonæum & musculos abdominis, referentibus *Platero, Liddelio, Blasio* aliisque. 3.) aliquando in omento, qui vocari solet *Ascites Epiploicus*, *Galeno* jam notatus *Comm. in Hippocr. 7. aph. 55.* Huc pertinet obs. *Horstii Dec. 6. Probl. X.* qui omentalem tumorem scirrhusum & glandulosum invenit libras 56 pendentem, exterius robusta & crassa membrana cinctum, in medio v. cavitatis foetida sordidaque sanie repletum: item celeberr. *Amstelod. Profess. Fr. Ruy-schii obs. chir. 18.* ubi refert, in cadavere mulieris XV. annos aliciticæ omnia viscera salva, tumorem tantum pilosum in omento repertum fuisse, quem ibi etiam delineari curavit. 4.) nonnunquam in duplicatura peritonæi formati ibi sacco inclusam aquam fuisse obs. referunt. Notabilis inter alias est obs. *Cl. Littrii*, quæ reperitur in *Obs. acad. scient. Paris. seu Memoires de l' academie anni 1707.* 5.) aliquando ipse ventriculus & intestina aqua repleta ob-

fer-

servantur, ubi plerumque universalis inundatio esse solet, alias huc non spectat, sed ad hydropes particulares. 6.) Singularis ascitis species est, quando *Hydatides* nunc parvæ magno numero, nunc una vel pauciores prægrandes pendulæ observantur in istis modo enumeratis interstitiis; notantur enim & inter musculos abdominis & cutim, it. in omento &c. Hæc proprio nomine ab autoribus insignitur, vocatur nempe *vesicularis*. Hanc primus *Aretæus*, & post illum plurimi observarunt, uti apud supra laudatum *Bonnett*. exempla legi possunt. conf. *Ol. Rudbek deduct. hepat. & vas. glandular. seros. c. 9. p. 289.* It. *Cel. Ruysch. lib. cit. obs. 27. figur. e.* Glandulas autem has hydatides esse, atque ita ab aqua distendi posse, ut ad tantam molem excrescant, recentiores anatomici ad sensum demonstrarunt. Nonnunquam enim ipsius tunicæ e.g. omento adhærentem reliquasque etiam non-nihil instar bullularum elevatas observarunt; sic in *Act. Hassniens.* refertur glandula omenti inusitatae magnitudinis ab *Ol. Borrich.* visa v. vol. 2. p. m. 203. sic in anasarca extinctis glandulæ subcutaneæ visum subterfugientes, optimè in conspectum prodeunt. Lymphatica & lactea sic extendi asserit *Cl. Bidloo Exercitat. anat. chirurg. Dec. 1. Exerc. 2.* in qua prolixè de hydatidibus agit, earumque varia genera recenset. 7.) Singularem obs. *Palfyn* habet *Chir. P. 1. c. 13.* ubi in cadavere asciticæ materia purulenta serosa in sacco duro & mensuram unius & dimidii capitis excedente, exterius inæquali, interius multis cellulis & loculamentis, communicationem inter se habentibus, repleto, inventa fuit. Parti superiori seu fundo uteri adhæ-

fuisse hunc faccum refert, quem nihil aliud fuisse putat, quam mirum in modum dilatatam & expansione sua cavitatem abdominis replentem tunicam exteriores uteri.

XXXIV.

Et ita ex hac ultima obs. etiam constare potest, quid de eorum sententia censendum sit, qui ubique in ascite *Epar* incusant. Idcirco enim solliciti eas tantum obs. colligunt, ubi *Epar* in cadavere male adfectum repertum fuit, & ita exinde falsam suam & inadæquatam procudunt Pathologiam.

XXXV.

Equidem optime memores sumus, (ut no. 3. §. 31. satisfaciamus,) illarum obs. ubi *Epar* morbidum conspectum fuit; nimirum nunc quidem *pallidum*, fere *exsangue*, nunc *tumidum*, nunc *atrum* & simul *densum*, *durum*, seu *scirrhosum*, infinitis quoque *coloribus variegatum*, sæpius tanquam *corium torrefactum*, nunc *abscessibus* purulentis obsessum, *hydatidibus* quoque repletum observatum fuit, v. *Ruysch. l. c. Obs. 45.* Reliqua exempla apud *Bonnet l. c.* legi possunt. Quanquam vero hoc verum esse fateamur, & ita ut plurimum hoc ita esse concedamus; tamen haud minus certum est, *primo* in allegatis obs. fere semper una c. epate etiam lienem, pancreas, glandulas mesenterii, omenti, renes male constituta fuisse; *deinde* prostant præter supra ex *Ruyschio* adductas obs. plures, ubi *epar* repertum fuit sanum: ita *Bonnettus* ex *Dodonæi* obs. l. c. refert urinam in abdomine effusam per aliquot foramina, in vesica urinaria producta ab uteri ulcere, repertam fuisse, salvis una c. epate reliquis

visceribus. *Rondeletius* quoque *Prax. c. 35.* ab ulcere mesenterii, reliquis visceribus salvis, productum asciten referunt.

Lienem corruptum & totam fere ipsius substantiam pici liquatæ similem in quodam hydropico, epate optime constituto, vide sis apud *River. obs. comm. 6.*

Reνες parvos, pallidos, nulla pinguedine obductos vid. apud *Schenck. obs. l. 3.* Eosdem multis ulceribus fistulosis perforatos, adnatis hinc inde renum corpori hydatidibus, ex quibus scissis aqua profluebat, erosa simul undique eorum exteriori tunica, observavit *Plater. prax. p. 260.* Sic etiam *parens b. m.* in ascitico quodam observavit renes plurimis vesiculis aqua plenis refertas, quarum una præ cæteris eminens pendulum faccum in abdomine formabat.

Testes seu *Ovarium muliebre* aliquando mirum in modum tumidum, lividum, quasi fungosum hydatidibus refertum in asciticis, vid. apud *Schenkium l. 3. obs. & Bauhin. in append. ad Rouffet de partu Cesar. it. Ruysch. obs. 17. l. c. Bidloo lib. cit. Dec. 1. Exerc. 2. p. 17.* exemplum habet hydatidis pendulæ ovario dextro alligatæ, quæ capiebat libras 40. liquidi, tanta cum ventris distensione, ut imprægnatam mentiretur. Tandem lubet & addere *Obs. 70. Cl. Ruyschii l. c.* quæ exhibet in cadavere asciticæ peritoneum variis in locis duris particulis arenulas mentientibus conspersum venamque portæ ex parte osseam factam, cæteris visceribus satis bene constitutis, omento tantum in totum consumto.

XXXVI.

Coeterum sunt nostro malo obnoxii præ omnibus aliis homines illi segnes, ignavi, stupidi, tardi, languidi, habitu corporis turgido, pallido, minusve firmis fibris præditi, in quibus etiam in universum aqueæ substantiæ abundantia in humoribus præsto est, quos vocant *phlegmaticos*. Post hos *sanguinei* vel ad minimum ex utroque temperamento mixta complexione gaudentes, conf. *Excellentiss. Præf. Patron. & Præceptor. ætatem devenerandum in Diss. de Temperam. fundamento morum & morborum in gentibus*.

Dein experientia confirmatum est, *omnis ætatis* homines huic malo esse expositos, proniores tamen præ aliis in hunc affectum sunt in ætate juvenili & media constituti, & uti notatum est ab *Excell. Arch. Regio D. D. Stahlio in Diss. de morbis ætatum*, qui tenera juventute catarrhosis defluxionibus vexati soepius fuerunt, posthac tumoribus oedematosi corripuntur, oedemata frequentissimè ascitis occasiones existunt. Interim qui obesi sunt corporis, & temperamentum superius descriptum possident, cum senium attingunt & quadam de causa elater vasorum dejicitur & ita excretiones segniter procedere incipiunt, soepius hydrope corripitur, obss. medicæ fidem faciunt, vide, si lubet v.g. *Cent. 4. obs. 13. & c.* Imò quod mireris, ne foetus quidem in utero materno semper ab hoc hoste tutus existit; vide si lubet tale exemplum in *M. A. Severino l. de recond. abscess. natura c. 36. p. 266. it. Plater l. 3. obs. p. m. 656.* Cum denique *Fœminæ* per antiquissimam jam opinionem frigidiores ut plurimum sint viris, si frequentius illis tumores cede-

oedematosos, asciticosque incurrant, non est, quod miremur.

XXXVII.

At enim vero cum recensitæ circumstantiæ (§. 36.) non eo sensu à nobis adducantur, ut eas pro causa morbi proxima venditemus, quibus vel singulis vel etiam conjunctim positis statim sequatur adfectus noster; bene enim meminimus, utrumque contingere quandoque, nempe, tum ut morbo hoc alius temperamenti, sexus & ætatis homines adfligantur, quàm nos recensuimus, tum etiam, ut homines, in quibus hæ circumstantiæ vel singulæ vel conjunctæ reperiuntur, alium quandoque experiantur morbum: sciendum hujus conditionis esse *ut plurimum* eos, qui hoc morbo laborant. Corripiuntur vero tum demum hi (v. § 36.) homines nostro morbo, quoties una vel altera ex sequentibus circumstantiis ipsis obtingit. Potest vero quandoque singularis sufficere, quandoque tamen plures junguntur, imo jungantur necesse est.

XXXVIII.

Nimirum 1. *Aer* frigidus humidus multum contribuit ad hunc morbum; inde tam frequens in locis maritimis, ut in Anglia, Belgio & similibus locis; quam 2. hisce gentibus solitus abusus *potuum* calidorum aquosorum, in nimia quantitate quotidie bis vel ter usurpari solitorum, minime hic excludendus sit, præcipue, si nullo modo, nec alvo, nec urina, nec sudore excernantur. Deinde 3. observatum e censu ut plurimum literatorum, monialium & monachorum fuisse asciticos,

D

ob

ob sedentariam quidem vitæ rationem; ob eandem etiam causam sartores, sutores, textores huc referendi, it. fullores, olearii, balneatores, piscatores, zythopeptæ, lotrices, quia in aere valde humido & vaporibus repleto degunt; imò quidam horum dimidia corporis parte in aqua versantur, hinc ad hunc morbum præ aliis sunt proclives. Conf. *Ramazzin Tr. de morb. opificum*. Ex *Tempestatibus* anni autumno maxime hydropes fieri asserit *Hippocr. S. 3. aph. 22.* nulla alia de causa, quam quoniam pluviis & nebulis ordinario aerem refert, caliginosumque reddit; medietas etiam illius, quæ vergit versus hyemem & multum frigoris junctum habet. Sique hisce *mæror & tristitia* animi, omnia, ut notum, in œconomia vitali languida reddens, & frequens usus crasforum, viscidorum, flatulentorum accedat ciborum, eo magis dispositum corpus ad morbum hunc suscipiendum evadit. *Aquas palustres & stabiles Oribasius l. 5. collect. c. 3.* & allium asciticis multum nocere, *Tulpius* notavit *l. 2. obs. c. 35.*

XXXIX.

Porro inducunt etiam asciten, frequenti medica experientia teste, *consuetæ Evacuationes suppressæ*. Ita ab urina suppressa hydropem secutum esse spatio paucorum dierum scribit *Nenterus pathol. med. p. 101.* Suppressiones hæmorrhagiarum per nares, per uterum, ut mensium & lochiorum, quacunque de causa contingant, sæpius excipit cachexia & hydrops in sanguineo-phlegmaticæ temperiei hominibus, ac plethoricis. Fluxus hæmor-

morrhoidum quacunque de causa cohibitus, præsertim in plethoricis, asciten producere potest. Vide *Hippocr. s. 6. aphor. 12.* Ita Trajanus imperator ex retentione hæmorrhoidum asciticus factus, semelque curatus recidivam passus ex eo mortuus est. v. *Dio Cassius.* Quod suppressos fluxus efficere diximus, illud pari ratione *immedi-*
ci efficere valent. Quid enim notius, quam quod excretiones sanguinis per nares, hæmorrhoides, uterum nimias, præsertim sinistre per restringentia medicamina repressas, hydrops excipiat. Excretio in dysenteria immodica sæpius mater hydropis est: *Hippocr. s. 6. aph. 43. qui*
lienosi, ait, *difficultate intestinorum corripuntur, iis supervenientem longam dysenteriam aqua intercus aut intestinorum lævitas excipit & moriuntur.* Hæc vero tum plerumque contingunt, si præpostere adstringentibus sistantur, nec æger debitis analeptics reficiatur. *Sudores* nocturni, præsertim circa æquinoctia salubri naturæ consilio contingentes, si intempestive supprimantur, asciten producere quandoque solent.

Omnia *Turgescentia* vel alimenta vel medicamenta, quæcunque nimirum sanguinem commovent, stimulando fibras, viis minime liberis ab obstructionibus, humoribus adhuc crassis, hydropi & ita etiam asciti progignendo ansam præbent; ita ex ulu *salium volatil. urinosorum* in corporibus spongiosis, si commotis jam humoribus, aut corporibus ad minimum plethoricis & calidis humoribus præditis adhibeantur, quia stimulando & stringendo solida tantum agunt, talia provenisse frequentius cautiores notarunt medici.

XL.

Frigida confertim haustæ potus, corpore prius calefacto, hunc morbum etiam inducit, a quo subito plerumque, intra paucos sc. dies, hic morbus oritur nullo pedum prævio tumore. Sic *Fr. de le Boe Sylvius in Tr. de morb. epidem. §. 540. p. m. 846.* observavit non semel, in ardore ac siti febrili intra duos tresve dies a potu copiosius ingurgitato excitatum fuisse asciten.

XLI.

Quædam quoque *venena* ad hunc morbum producendum efficacia esse notarunt, ut *Buprestis* &c. sic memini quoque me legisse, a *vermibus* intestina vasaque lymphatico - lactea in iis hiantia corrodentibus hunc morbum quandoque ortum fuisse. Huc etiam referri meretur, quæ a violentia externa hujus morbi inducitur causa, ut quæ fit a contusione e regione epatis, ita a vulnere externo, cujus habet egregium exemplum *Parents* ο παραγιτης in milite quodam gregario, qui vulnus „acceperat in sinistro latere tribus super papillam digitis. „Hujus militis corpus tribus a vulnere accepto horis totum ita intumuerat, quasi hydropicus a longo tempore „fuiſſet æger, cujus sanitas cum omnibus medicis præsentibus desperata videretur, sudoriferis & diureticis propinatis, non neglectis interim medicamentis accommodatis, integre restituta est. Non negamus tamen & aerem hic esse accusandum. Denique, quin excessivæ crebræ potationes *spirituosorum tam vinosorum, quam imprimis ardentium* liquorum huic morbo sæpius ansam dederint, dubitare nos non finit experientia,

tia, præprimis tamen in spongiosis illis corporibus, debilibus præditis fibris & hinc excretionibus secretionibusque languidis hæc contingere solent. Pari ratione *acidulæ & thermæ* sortiuntur hunc a vulgo jam declamatum effectum.

XLII.

Cum foecunda semper malorum reperiatur progenies, & hunc nostrum adfectum sobolem plurimum *præcedentium morborum* esse, res videtur admiratione minime digna. Ita *febres intermittentes* male tractatas per chinam chinæ &c. in personis succi plenis & laxioris habitus corporis, imprimis foeminei sexus, vitæque otiosæ & sedentariæ excipit communiter tumor œdematoso-hydropsicus, deinde etiam ascites, conf. *Excell. Dn. Præsidis Præceptoris ætatem devenerandi Ideam medic. fund. C. de morb. ex imprud. medicatione.*

XLIII.

Succedit quoque omnibus pertinacibus *viscerum obstructionibus*, *scirrhis* quoque epatis, lienis, pancreatis, uteri, intestinorum, glandularum majorum mesenterii, seu omnium seu præcipuarum, ac renum. SuffICIENTER hæc docent obs. practicæ, & ipsæ cadaverum sectiones, conf. §. 35. Et hæc est frequentissima fere atrocis hujus mali humanum genus depopulantis scaturigo, sic enim *Avus b.m.* in msst. sæpius allegatis ita de se scribit: *Experientia mea „qualicumque didici, nullum hydropicum vere ita dictum „sine alicujus visceris obduratione, nunc majori nunc leviori, mihi fuisse oblatum.*

XLIV.

Morbos quoque acutos imprimis ardentissimos v. g. inflammatorios viscerum, sive ægri in iis sitim suam inexplabilem nimio potu demulcere imprudenter tentaverint, sive quandoque etiam sine siti fuerint, haud raro insequitur ascites.

XLV.

Cachexiam excipere etiam solet dirus hydrops, ita quidem frequenter, ut inde a quibusdam cachexia pro primo hydropis gradu habita fuerit; quod quanquam non penitus sit verum, tamen cachectici in proxima dispositione ad hydropem positi sunt, & devolvuntur denique sæpius in statum asciticum. Est vero hoc metuendum præprimis in iis subjectis, ubi vigor activitatis vitalis remittit. vid. Excellentissimum D. Stahlum, in Diss. de Cachexia §. 21. Præsertim vero martialia improvide data in cachexia infantum hunc fortiuntur effectum, testis erit iterum Excellentiss. D. Præses c. 1. §. 42.

XLVI.

A tympanitide quoque haud raro hic morbus oritur, semper enim hæc paullo diuturnior in ascitē degenerat, nisi homo valde sit debilis vel alio symptomate mors præveniat, uti observavit Avus b. m. in msst. citat. conf. etiam Bagliv. in diss. varii argumenti p. m. 72. & 94. ubi duos insignes casus refert tympanitidis in asciten mutatæ. conf. supra §. 16. & 28.

Nonnunquam etiam Icterus terminatur in hydropem, uti & Scabies retropulsa, conf. Bagliv. l. 2. Prax. med. §. 9. ubi locum ex Hippocr. in Epidem. refert; item Scorbutus

butus, vide hic imprimis *Eugalen. de Scorbuto*. *Podagram* in asciten degenerasse non raro, asserit *CL. Wedelius*. Nobis etiam constat, *curam lactis* in podagrico quodam intra septimanarum duarum spatium hydropem abdominis produxisse, qui creberrimis purgationibus tandem sanatus fuit.

„*Ulcera* quoque *repressa* hunc morbum producant: „ita *avus b. m.* ex fistula ani 20 annorum temere suppressa „asciten sensim generatum fuisse observavit l. c. idem in „virgine 24 annorum ex apostemate & ulcere umbilici, „ex suppressione mensium proveniente, eundem morbum procreatum fuisse notavit.

XLVII.

Haftenus omnia bene procedunt & habemus hic non facile quendam contradicentem, cum omnia certæ observatorum experientiae innitantur; sed aliter sese rem habere, cum ad causam huius mali proximam devenit, cuilibet scripta medicorum evolventi patebit.

Abeunt enim hic indiffersa autores: Plerique epar incusarunt, cum eo tamen discrimine, quoad fundamentum imputationis, ut antiquiores *Galenici* usque ad *CL. Sennertum* epar dixerint esse causam proximam ascitis, quoniam eo per scirrhus aliosve morbos male adfecto sanguificatio lædatur, huius vero læsionem hydropis unicam esse causam firmiter credebant.

Fernelius ex ruptura *ὕδατος* in epate, quas rimas seu fissuras vocat, serum in cavitatem abdominis destillare & omnem asciten eo modo produci asserit.

Deni-

Denique sunt ex Recentioribus, qui epar præcipue in hoc morbo respiciunt, quia est præcipuum lymphæ colatorium, Conf. *Excell. archiatr. D. Stablium Præceptorem meum omni honoris cultu prosequendum in Diff. elegantissima de Hydr. Ascite* §. 23. 26. & seqq.

Helmontius in renibus sedem causæ ponit, dum in *Tr. suo Ignotus hydrops* §. 20. n. 19. post pauca inquit: „Causa immediata tam materialis, quam efficiens veri hydropis est archeus renum errans, quatenus sc. exorbitat, ac in furorem velut percellitur, a causa occasionali ideam gignit sive speciem --- per quam sc. vix aut non separatur urinam --- quin etiam velut furiosus dimittit laticem ad abdomen, ut sui velut internecionem procuret.

XLVIII.

Non libet examinare fusiùs hæc opiniones. Brevibus dicam: mihi omnes illi errare videntur, qui unicuique tantum viscus pro causa hujus morbi proxima allegant. Quid enim respondebunt illi v. g. qui pro epate pugnant, si opponamus sectiones illas, ubi epar sanum deprehensum? conf. §. 34. & 35. similiter renes salvi adhuc pluries reperti; quorsum ergo ruet *Helmontii* hypothesis? v. §. 47. At, inquit, sæpius imo ut plurimum epar in asciticorum cadaveribus læsum fuit repertum, & *Helmontiani* similia pro renibus allegabunt exempla, alius aliud viscus accusabit. Verum respondeo: vera sunt hæc omnia, est in epate, est in renibus quandoque, imò fit ita, ut plurimum vitium deprehensum, sed ut plurimum non semper. Divide & imperabis.

Nimirum nullum est viscus (per §. 33. & 35. in abdomi-

domine quod non quandoque in asciticis læsum reper-
tunt, quandoque etiam plura uno læsa deprehensa fue-
runt; imo omnia viscera interna multis vesiculis materia
viscosa & aquea plenis referta, quarum numerus excres-
cit nongentas, reperit *Horstius Opp.V.2. lib. x. p. m. 541.* Er-
go nullum ex visceribus unice & semper in culpa erit.

XLIX.

Subolfecit istud jam dudum *Celsus L. 3. c. 21.* ubi Era-
sistratum confutans, qui etiam solum jecur hic adfici pu-
tavit, *non hujus*, inquit, *visceris unius hoc vitium est.*
Nam & splene adfecto & in totius corporis male habitu fit.
v. quoque Cæl. Aurelian. Tard. passion. l. 3. p. m. 435. Pa-
rem errorem errarunt etiam illi ex veteribus, qui a nimio
calore, seu *intemperie calida*, hunc morbum deducunt,
inter quos etiam *Celeberr. Conringius* reponendus est. In eo
enim error latet, quod eam solam, uti alii ex veteribus
contra frigidam intemperiem, pro causa adducunt, re-
liquasque omnes excludunt. Nihil enim familiarius est,
quam quod idem effectus sæpe etiam contrariis causis
suam originem debeat. Nolo in dubium vocare, a calo-
re nimio quandoque hæc produci, cum experientia hæc
sat clara sint; neque tamen minus evidens erit, si & fri-
gus nimium & nimis diu durans, quod humores
æque coagulando ac calor nimius exsiccando inspis-
sat, in eadem classe reponam. Fieri etiam potest, ut
sine vitio alicujus visceris hydrops nascatur: ut quando
ab errore externo per §. 40. serum in abdominis cavitate
colligitur. Hic enim obstructio glandularum forte va-
forum lacteorum in mesenterio produci videtur, quod et-
iam ex modo curandi, quo *Piso in Tr. de morbb. a serosa collu-*

vie usus est, (nimirum dedit tabulas Diacarthami, qui roborando seu leviter adstringendo simul purgant,) confirmare videtur.

L.

Non vacat nobis pluribus hic inquirere in causam mali nostri proximam, brevibus igitur rem expediemus. Si indolem causarum (a §. 36. ad 47.) cum natura effectus conferamus, concludemus sequentem in modum: Liquor, qui in asciticorum distento abdomine continetur, est vel urina vel serum sanguinis, vel lymphæ, vel pus. conf. §. 32. *Urina*, quod ex corrosa vesica urinaria per ulcus v. §. 35. in abdomen confluere debeat, in propatulo est; *Pus* provenit, cum epar aliæque abdominalia viscera, vel etiam mesenterium ulceribus vel abscessibus purulentis obsidetur, conf. §. 35. *Pus sero s. lymphæ permixtum* replebit abdomen, si ab ulcere una cum sanguineis vasa lymphatica vel lactea v.g. in mesenterio corrosa sint, conf. §. 35. & hic unus modus est, ubi ex ruptura vasum lymphaticorum hic morbus per *diaeresin* producitur, ab ulcere nimirum.

LI.

De causis vero ulcerum hic loqui res non est huius loci. Quomodo vero alio modo *lymphæ* huius mali causa proxima esse queat, sequentem accipe modum: nimirum lymphæ si stagnat, distendet vasa continentia & hydatides pariet, sique diu duret malum, nimia distensione rumpet vasa. Ad stagnationem deducitur vel vitio *sui* dum sc. spissitudine peccat & ita obstructions efficit; vel vitio *glandularum secernentium*, quæ obstructæ vel scirrholæ sunt. Cum igitur lymphæ circulatio impedita sit,

sub-

subsistit & ante dicta mala parit. Lympham vero spissam reddunt ea, quæ §. 38. adducta sunt. Hæc enim dejiciunt tonum solidorum, quorum elatere dejecto vigor secretionum & excretionum imminuitur; spissæ itaque partes remanent in humoribus, cumque massa humorum minus strenue propellatur, semper spissescencia augetur. Solidarum enim partium vitia fluida mutant in pejus & vice versa, ita ut mutuas causarum & effectuum vices hæcce agant. Præprimis vero atonia partium maxime posthac malum fovere solet.

LII.

Ubicunque igitur *glandule* vel *vasa lymphatica* sunt in abdomine, ibi ascitis inveniemus causam effectricem. Ergo non tantum in epate, sed & in liene, renibus, glandulis mesenterii, omenti, pancreate &c. sedes erit causæ hujus morbi proximæ, quandoque in uno viscere solo, quandoq; in duobus, tribus conjunctim, imo in omnibus per §. 48. aliquando in vasis lymphaticis solum hærebit. In casu enim §. 40. & 49. adducto certe glandulas salvas esse & lymphatica tantum ita distenta vel rupta, valde vero simile videtur. Refert etiam *Dimerbroek L. 1. c. 12. p. m. 66.* salvis plerisque visceribus lymphatica tantum rupta in hydropico observata fuisse.

LIII.

Et iste modus (§. 50.) quidem satis evidens est, non tamen adfirmare hunc solum atque unicum esse, quo ex obstructis visceribus noster adfectus oriatur; sic ut quidem asseramus, hydatidas istas in visceribus imprimis observatas ab omni causa obstruente & impediante refluxum semel advectæ lymphæ oriri,

nondum tamen affirmemus, causas istas obstruentes necessario & semper hydropem producere, & si hunc producant, factis id hydatidibus fieri debere.

LIV.

Experimentum a *Lowero Tr. de corde c. 2.* vel ex eo a *Willisio Pharmæ. ration. S. 2. c. 3.* descriptum etiam nostrum supra adductum (§. 50.) fiendi modum illustrare videtur, ubi ligatis venis, arteriis vero liberis relictis, & ita adfluxu uti sanguinis ita & lymphæ, quam ab arteriis autores deducunt, vigente, refluxu vero impedito, secessio lymphæ, i. e. irruptio nimis magna lymphæ in vasa sua, horumque tandem disruptio contigit, & ita ascites prognatus fuit.

LV.

Sanguificationem vero inde (§. 50.) turbari debere, seu sanguinis confectionem non rite fieri posse in asciticis, inde patet, quod chylus cum lymphâ omnium fere partium sub diaphragmate positarum prius cisternam lumbarem chyli ingredi debeat, quam in ductum chyliferum, & demum ex hoc in venam subclaviam pervenire queat. Cum autem in abdomine asciticorum maxima ex parte retinetur, quomodo chylus in sanguinem mutari poterit? Inde etiam fit, quod partes superiores in thorace positæ suo nutrimento debito & lymphâ defraudentur. Hinc ratio petenda ejus, quod §. 13. de contabescentia asciticorum & §. 18. de eorum siti adductum fuit.

LVI.

Notari etiam meretur, quandoque in causando priorem locum obtinere vitia viscerum, quandoque vero vitium liquidi, & nonnunquam ipsam feri collectionem, ita

ita ut ab hac illa dependeant, ut iis accidit, qui ab haustu enormi frigido in dispositionem hydropis (§. 40.) conjiciuntur. Et hoc etiam in culpa est, quod ordinem causis hactenus adductis assignare nequeamus; est etiam hoc ipsum in genere factu impossibile, & debet hæc discretio in ipso individuo a prudenti medico fieri. Quæ enim in quibusdam ægris proximum inter causas locum occupabunt, hæc ipsa in aliis remotius concurrere ad producendum morbum videas. Sic nunc hoc viscus proxime ascitis sedes erit, nunc magis remote, ac, ut vocant, per consensum ex aliorum viscerum actione læsa adficietur. Neque enim ipsæ sectiones cadaverum solæ indicant proximam mali causam; nam sæpius effectus est, quod nobis patefaciunt: ut nunc taceam morbos conjunctos, ubi semper sedulo attendendum, quænam visceris læsio alicui morbo adscribenda veniat. Haud raro etiam effectus morbi, imprimis diutius protracti, esse solent, quæ immediate ipsum morbum produxisse putantur.

LVII.

Forte etiam *Serum* ex ipsis vasis sanguineis majoribus ac minoribus visceribus ipsis intextis, quandoque majori in copia per poros tunicarum transfudat & in cavitatem abdominis recipitur, (vocant per diapedesin,) qualem modum etiam *Cl. archiater D. D. Stablius in Diss.* sæpius citata non improbabiler adstruit, sc. lympham per poros vasum lymphaticorum ita exsudare in cavitatem abdominis, (præprimis cum rupturam eorum non facile contingere asserat) præcipue si per exteriora abdominis indumenta foras exire nequeat, vel quod meatus in cute sint obstructi, constricti a frigore externo &c.

vel quia in majori proportionē transfundat, quam quod evacuari possit per ordinariam diapnoē vel diaphoresin e corpore.

LVIII.

Forte quoque, si, quod probabile est, vascula minima omento inserta in abdominis cavitatem hient, atque ibi vaporem illum, quo irrorata viscera in sectionibus cadaverum deprehendimus, emittant, hæc vascula anastomosi facta causa collectionis hujus serosæ esse possunt.

LIX.

Plures forte sunt modi, quibus hic morbus producit; præcipuos tamen evidentiores admodumque probabiles, ni fallimur, omnes attulimus.

Hæc ita paucis de ætiologia morbi nostri adduxisse sufficiant. Possemus facile inde explicare phænomena & reliquos effectus hujus mali in historia morbi (§.6-22) adductos. Hæc enim omnia tum ex confectio-
ne chyli læsa, ipsam sangvificationem lædente, malaque omnium partium nutritione, tum ex ipsius feri stagnantis corruptique effectibus, quasi summis capitibus, facili negotio deduci poterunt.

Sed potius trademus hujus mali *Differentias*. Hæc igitur ex superioribus collectæ erunt sequentes.

LX.

Nimirum Ascites (1.) *ratione loci* secundum quosdam distinguitur in *verum & spurium*. Verum vocant, ubi aqua in cavitate abdominis, spurium, ubi non in cavitate libere continetur, sed clausa est in membranis quibusdam, ut in sacco peritonæi. v. *Palsyn. l. c. & Mr. Littre l. c. (v. §.33.)* in vesiculis quibusdam (v. §.33. no. 6.) seu dilatatis glan-

glandularum cavis, vel vasis lymphaticis &c. (2.) differt *ratione cause continentis*, conf. §. 32. (3) *ratione cause remotæ internæ*, ut aliquando scirrhi epatis, lienis aliquando &c. conf. §. 35. (4.) *ratione complicatorum morborum* v. §. 14. 16. 28. inde vel exquisitus vel minus exquisitus audit. (5.) *ratione durationis*, v. §. 29. ut inde vel *recens* vel *inveteratus* sit. (6.) denique quidam ab aliis morbis prægressis ortus, quidam non. v. §. 42 - 47.

LXI.

Imminere morbum nostrum suspicio seu metus est, cum causas præcatarticas & præægumenas (v. §. 38 - 47. it. §. 36.) præcessisse ex ægro cognovimus, pedes aliquando tumere incipiant, & quanquam rursus subsideat, tamen redeat tumor, appetitus pereat, urina pauca, tenuis, aquosa, cruda excernatur, subjectum incipiat ad omnes animi & corporis motus tardum & segne esse, respiratio difficilis adsit præcipue sub adscensu scalarum. Adhuc magis hic metus crescit, si cachecticus status præsens sit simplex vel scorbuto junctus.

LXII.

Adesse vero asciten Signa ex historia morbi supra recensita, & exinde facile colligenda patefaciunt, addendum tantum iis, quæ de tumore abdominis ibi monuimus, nunc unum tantum latus tumorem occupare, nunc utrumque, ita ut venter quasi in duas partes dividatur. Probe quoque observandum, ne confundantur *asciticae* & *gravidæ* mulieres. Discernere autem eas ab invicem ex sequentibus nos docet *Ettmüllerus*: (1) ex colore faciei vivido & bene habito in gravidis; sed hoc per §. 13. fallere potest. (2) ex tumoris specie. In gravidis tumor abdominis

dominis ad præcordia sursum vergit estque inæqualis; In hydropicis autem inferior pars abdominis intumescit, mammæ detumescunt, & tumor undique æqualis & quasi œdematosus est sed quod hoc ultimum attinet, semper illa præ oculis habenda, quæ in initio hujus §. monuimus. (3) signum certum ascitis est fluctuatio in abdomine, sed confer §. 10. (4) vivacitas & vigor oculorum significat gestationem. (5) urinæ in gravidis non sunt ita constitutæ, ut asciticorum. (6) quo se vertunt ascitici, eo labitur aqua, conf. iterum §. 10. (7) sitis in hydrope juncta est, in gestatione non, conf. §. 18. (8.) sub hydrope menses sæpe fluunt, in gestatione non &c. Hoc ultimum signum tamen minime certum est, cum etiam in gravidis nonnunquam menses fluxerint; quale v. g. refert exemplum *Lottichius obs. med. l. 5. obs. 17. it. Gregor. Horst. opp. T. 2. l. 5. obs. 34. 41. 48. &c.* nec semper abortum minatur talis fluxus, uti *Cl. Wedelius in Diss. de not. gravid. c. Hippocr. S. 5. aphor. 60.* asserit: contrarium enim quandoque contingere supracitatae ex *Horstio obs.* nos docere poterunt. Motus infantis in utero vigesima septimana contingens omnem dubitationem tollere debet.

LXIII.

A *tympanitide* ascites ita discriminatur secundum *Menniotium in Diss. patholog.* quod tympanitici liberior respicient & decumbant quam ascitici, partes etiam supernæ in illis minus discrucientur quam in his, nec inferna membra in tympania extumescant perinde ac in ascite fieri solet. Abdomen ad concussum manus prætensione resonum est, pressum vix demergitur; moxque resurgit, nec ut in ascite impressionem servat: attende tamen in hisce ultimis signis ad ea, quæ §. 8. jam monuimus. LXIV.

LXIV. Quomodo dignosci debeat, an *hydrops ovarii* muliebris adsit [v. §. 35.] inter desiderata medica ponendum est.

Ipsam cavum uteri clauso accurate ejus orificio interno tantam aquarum copiam nonnunquam collegisse, ut mentitus fuerit ascitem, vide sis apud *Greg. Horst. opp. T. 2. obs. l. 4. obs. 53. Actium l. ult. p. 79. 109. Fernel. pathol. l. 6. c. 15. Hildan. obs. 56. Cent. 2. it. Vesal. Anat. l. V. c. 9. p. 627. & 628.* qui supra 60 Augustanas mensuras aquæ in utero hydropico invenit. Quomodo talis uteri hydrops ab ascite discerni debeat, cum perfecte quandoque eundem mentiatur, & graviditatis specie medicum fallat, cum ignarissimis nescimus, nec apud autores consignatum reperimus; nisi quod tentata curatio per fomenta relaxantia, vapores tales, it. uterina adhibita detexerit aliquando morbi sedem.

Quando a morbis prægressis, ut febribus, scirrhis &c. profectus ascites & ab iisdem foveatur, hoc & ex relatione ægri & ex signis cuilibet morbo propriis petatur, ex quibus ultimis etiam dignosci debet, quænam pars adfecta sit.

LXV. *Prognosis* quod concernit, eandem supra in historia morbi jam recensuimus, ut quædã tantum addenda habeamus. Nimirum

(1) *Ratione specierum* hydropis: ascites omnis hydropis speciebus periculi gravitate præit, quod confirmat *Aretæus l. 2. diut. c. 1.* „dum inquit: omnes species hydropis quidem pravæ, inter ipsas „autem leucophlegmatia mitior, difficilis flatuosa, difficilior anasarca, maximi momēti etiã vesicalis, ascites certe periculosissimus.

(2) *Ratione ægri*: primo melioris spei est in juvene & robusto homine ob majorem vitalis activitatis vigorem præsentem. Dein facilius sanantur temperantiæ adsueta nec luxuriosi, imprimis a potu, quantum fieri potest, abstinentes: hæc enim causa est, quare *Celsus l. 3. c. 21.* judicavit, facilius hoc malum in servis, quam in liberis „tolli, quia, inquit, cum desideret famem, sitim, & mille alia tædia „longamque patientiam, promptius iis succurritur, qui facile coguntur, quam quibus inutilis libertas est. Cautus igitur sit medicus in Prognosi, ne intemperantia æger prædictum ex natura morbi exitum fallat.

(3) *Ratione Cause*: Ille ascites, qui a vasis lymphaticis ruptis fit, curatu impossibilis existit, nisi ruptura sponte coalescat. Immediabilis etiam, qui ex ureterum, aut vesicæ, aut renum, aut mesenterii

terii &c. læsione, ruptione aut exulceratione oritur. Difficulter & fere nunquā sanabilis, qui aliis morbis succedit, imprimis, qui scirrhis viscerum inveteratis debetur (si enim recentes & leviores sint, nec per hydatides v. §. 33. n. 6. morbum produxerint, modo §. 51. & 53. descripto, aliter utique sese res habet) dein, qui acutis & chronicis, qui diutius ægrum detinuerunt, ejusque vires detriverunt, supervenit, secund. *Hippocr. 7. prognosticor.* Sanabilis tamen ascites, qui febres suppressas v. §. 42. vel hæmorrhagias suppressas, vel etiam nimias v. §. 39. it. scabiem retropulsam v. §. 46. excipit, si tamen statim in initio medicina adhibeatur, quod etiam dictum sit de illo, qui ab errore externo defubito ortus, v. §. 40. vid. etiam *Piso in Tr. de morb. a serosa colluvie obs.* 112. Bene igitur constitutis visceribus melior spes apparet, unde *Hippocr. in Prorrheticis* eos, qui ab hydrope servari volunt, εὐσπλαγχνος esse debere adfirmat, conf. *Coac. prænot. text. 275. & seqq.* (4) *Ratione Symptomatum*: Magnitudine, vehementia, & varietate accidentium & corruptione virium magis incurabilis judicatur: parva vero magnitudine atque paucis & simplicibus accidentibus, quæ Græci symptomata appellant, & sine nimia virium læsione, minime curatione difficilis approbatur, ut verbis utar *Cal. Aureliani l. 3. Tard. Pass. c. 8. p. 424.*

Apostasēs vel maculæ in cruribus erumpentes lethales sunt, v. *Hippocr. 7. Epidem. it.* Ulcera incurabilia plerumque sunt & ad mortem ducunt, quod etiam optimus *Senex* adfirmat *aphor. 8. 6. it. Corn. Cels. l. 3. c. 21. de tussi Hipp. S. 7. aphorismus 47.* prostat, ubi ita: *si hydropicum tussis habeat, desperatus est, conf. S. 6. aphor. 35.*

Pro meliori signo etiam a medicis habetur, si, quod rarissimum tamen, sitiant parum, e contra commode plus minus appetant; Ille æger tamen, de quo supra §. 18. mortuus est, an forsan ideo, quod nulla medicamenta assumere voluit? uti *obss. msst. avi b. m.* referunt.

Denique quo magis excretiones naturales supprimuntur, eo pejus, quo minus a statu sano recedunt ac quodammodo etiam augentur, eo melius est: sic enim *Celsus l. 3. c. x. si plus humoris excernitur, quam assumitur, ita demum secunde valetudinis spes est.* Reliqua vide in historia morbi. (5) *Ratione sedis morbi* seu loci, ubi aqua continetur. Si aqua contineatur in vesiculis quibusdam seu hydatidibus v. §. 33. n. 6. incurabilis est, nulla enim arte humana ibi contentas educi potest, nisi sponte, uti §. 26. dictum,

ope

ope naturæ sanetur, quod tamen rarissimum. Ascites epiploicus dictus v. §. 33. etiam immedicabilis est, quorsum referendus *Hippocr. aph. 55. f. 7.* ubi ita: *quibus epar aqua plenum erumpit in omentum, iis venter aqua impletur & moriuntur.* Idem quoque iudicium de eo ferendum, quem §. 33. n. 7. adduximus, ob easdem rationes, quas de vesiculari dedimus. Nec illi, qui eo detinentur, quem §. 33. n. 4. descripsimus, meliori gaudebunt fortuna. Optimæ species coeteris paribus sunt illæ, quæ n. 1. & 2. §. 33. describuntur, quæ bonam spem de se præbent, si reliqua conspirent, & modo suis se signis manifestent, ut a superius recensitis fecerni queant. [6] *Ratione durationis* seu status morbi: Inveteratum hydropem incurabilem esse, in confesso apud omnes est rationales medicos. [7] *Ratione complicatorum morborum* hoc notandum, eum ascitem, qui cum tympanitide incipit, ut plurimum esse lethalem. Alius ascites, qui cum leucophlegmatia copulatur & a pedibus incipit, non adeo periculosus est [in suo tamen genere.]. [8] *Ratione temporum anni:* Ita enim *Cæli. Aurelian. Tard. Passion. l. 3. c. 8. p. 434.* æstatis tempore laborantes difficulter sanari putat, siquidem multa siti adficiuntur, de quo plura ibi legi possunt. v. *Cels. l. 2. c. 8.* Atque hæc de Prognosi sufficiant.

LXVI. Aggredimur nunc *Therapiam*, quam sequenti modo pertractabimus. *Indicationes generales*, quibus hic morbus arte medica profligari poterit, respiciunt vel causam continentem, i. e. illud fluidum, quod in abdomine p. n. contentum eundem distendit; vel causas proximas hanc continentem producentes, vel causas procatacéticas & proëgumenas. Quæ proëgumenas & procatacéticas respicit indicatio, eam vocant *servatorium*, quæ vero duas priores, *curatorias* dicuntur. In genere monendum, esse e re ægri, ut curatio initio mali suscipiatur; hic enim valebit illud: Principiis obsta &c.

LXVII. *Curatorias* indicationes sequenti modo exequemur:

1. Evacuatione liquidi stagnantis in cavitatibus abdominis v. §. 33. n. 1. & 2.

2 Remotione, & correctione causæ hujus extravasationis seu collectionis liquidi, uno verbo fontis obturatione, v. §. 35. 51 & sq.

3. Restitutione toni viscerum dejecti v. §. 38. &c. it. 51.

Ab *evacuatione* liquidi cura incipienda, (non a causæ sublatione.)

& hoc eo citius, quo majus periculum ab humore effuso diutius ibi stagnante metuendum; nam corrumpitur, ac redinem concipit partes, quas alluit, corrodentem, imo gangrænam & sphacelum viscerum sæpius producit. Tentabimus vero eandem variis modis, ut

a) *Subducendo* per alvum. Præparantia non opus esse arbitrantur autores, cum humores satis fluxiles sint, si tamen circa primas vias mucus hæreat, is abstergendus, digerendus, & evacuandus digestivis jam sat cognitis. Ad evacuationem ipsam quod attinet, commendant hic ut plurimum fortiora, nota tamen sunt exempla, ubi datis fortioribus ne minimum quidem asciticis alvus mota fuit, leniora e contra & eccoprotica fortiter eandem subdixerunt. Cavendum & hic imprimis, ne nimis fortiter purgantibus diarrhœam excitemus non semper tutioris eventus, & ut hanc educationem potius per vices corrigentibus interpositis exequamur, quam una vice ægrum evacuando, vires & ipsum viscerum tonum hic maxime conservandum, & qui nimium quantum jam hic periclitatur, dejiciamus. Confirmat hoc *Excellentissimus D. Præses in Diss. de Purg. fortior. &c. §. 17.* ubi de methodo tractandi hydropem per drastica loquens subjicit: hujus naturæ remedia cum tonum ventriculi & intestinorum hoc morbo jam labefactatum penitus lædant & destruant, & violenta constrictione flatulentis & lymphæ stagnationi magis occasionem præbeant, non possunt non irreparabile damnum hoc malo correptis inducere, & quæ ibi sequuntur plura. Certe toni dejectionem gangræna sphacelum denique producens non raro sequitur. Sic *CL. Rollfinkius* observavit, subitanea tali feri evacuatione catarrho suffocativo virum illustrem extinctum fuisse. Imo, cuius supra obliti sumus, purgantia drasticotera hydropem produxere. Ita enim *Excellentissimus D. Præses l. c.* refert ex *A. N. C. Dec. 3. A. 4. obs. XI.* civem Wittenbergensem post sumtum a circumforaneo purgans drasticum incidisse in hydropem ascitem, & ægre tandem valetudini pristinae restitutum fuisse. Rejicimus igitur drasticotera illa purgantia, gumm. gutt. scammon. elaterium &c. nisi quod bene præparatis viis & humoribus, ubi leniora non sufficiunt, stimuli loco quandoque ad aliquot grana propinari possint. Commendamus potius leniora illa, qualia sunt rhabarbarum, fol. sen-

næ, tamarindi, mechoacanna, myrobalani; imprimis succus iridis nostratis c. manna & fyr. de cich.c. Rheo mixtus egregie aquas sine molestia eduxisse sæpius visus est Avo. b. m. in msst. Vel possunt exhiberi, secundum egregiam methodum *Excell. D. Præsidis*, fortiora in refracta dosi c. additione salium digestivorum v. g. resina Jalapp.c. pineis vel amygd. trita ad monitum Zwölfferi paucorum 3. 4. granor. dosi c. tartari vitriolati gr. jv. extr. panchym. Crollii gr. x. A scr. i. mechoacannæ præparatis pri9 humorib9 hydropicos ultra x sedes copiosissimas habuisse refert *Excell. D. Præsides in diff. cit.* Pulverem Jalapp. ad scr. fem. cum rhab. dosi anatica & tartari vitriolati gr. io. exhibitum ascitico, eundem satis fortiter evacuassee & ad 20. sedes provocasse refert *Avus* b. m. l. c. Solo usu rhabarbari continuato quosdam asciticos curatos fuisse memorant autores. Credo fuisse in initio morbi, visceribus nondum valde obstructis, adhibitum, alias & roborandi, attenuandi, & diuretico scopo prodest lenissimum hoc catarcticum.

β) *Per diaphoresin*: Quanquam non soleant facile ad eandem disponi per §. 24; sæpius tamen per hanc viam solutus fuit morbus; ita referente *Cl. Boërhavio, Præceptore colendo, in Coll. mssto in aphorismos*, chirurgus quidam Leodiensis cuidam ascitico epithema ex sale communi, ægro fornaci propius admoto, applicuit, & madefacto uno novum siccum apposuit, & ita exsiccando eundem curavit. Magis tamen hic per *externa topica* excitandus sudor, quam per interna diaphoretica remedia. Hæc enim parum vel nihil, obstructis cutis exterioris poris, efficient. Ad naturam ægri singularem hic etiam respiciendum, an ad hanc evacuationis speciem f. viam inclinet, & circumstantiæ reliquæ morbi patiantur commotionem talem humorum. Si enim ægri in statu sano natura non proni fuerunt ad sudores, dyspnœam hic facile augebimus, imprimis si plethorici sint.

γ) *Per vomitum* quoque educi posse materiam in personis alias evemetis, junioribus, viribus nondum a morbo prægresso prostratis, & in initio mali, testantur *obsf. conf. & § 25*. Accedit, quod & sæpius soleant simul evacuare per alvum & urinam, imo qui effectus quandoque præ omnibus aliis expetendus, quia obstructa viscera & infarcta referare atque sic *causam* simul & *fomitum* huius mali tollere motu suo concussorio valent. Præprimis tum indicantur,

si signa humorum circa ventriculum & tenuia intestina hærentium, vel muci in ventriculo præsentis ex nausea spontanea adsint. Potest exhiberi v. g. sal vitrioli, quod roborandi & incidendi vi pollet simul, ad scr. i. vinum emeticum vulgare ad uncias ij. & c. poterunt digestiva salina, ut alias fieri solet, vel præmitti vel conjungi.

δ) *Diuretica* hic sæpe profuisse obs. medicæ testantur. Ita profuisse Spadanas aquas, forte reſeratis simul visceribus, probabile est, v. *Henr. ab Heers obs. 1. p. 37.* Forte etiam tali modo suum effectum produxere Teplicenses, de quibus *Jac. Janus*, Archiat. Reg. Daniæ, in *Epp. ms. St. ad Avum b. m.* sic scribit: Nota mihi sunt exempla hydropicorū, qui hic plene & totaliter convaluerunt, etiā constanter & absque recidiva. Non tamen hæc exempla statim in imitationem transire debent, cum non semper de certitudine effectus, & ægri interna viscerum conditione constet; an sc. tantum iis suppetat robur, ut eam aquarum molem superingestam digerere, secernere, & excernere possint. Non paucos enim hunc quasi acherontis potum bibisse & sic sibi mortem conscivisse, etiam in vulgus notum est. Melius hunc scopum, siquidem natura præeunte v. §. 22. hanc viam tentare velimus, impetrabimus falsis illis digestivis simul incidentibus, quæ duplici hic scopo profunt. Adhibeantur ergo salia neutra falsis mixta in statu ægri calidiore febris juncta; in statu vero frigidiore & absente febre diuretica ex vegetabilibus e. g. petroselin. foenic. puleg. fœseli cretic. linaria, asparagus, rad. graminis, vincetox. pimpinell. alkekengi & c. vina Rhenana juniora, Mosellana & c. e compositis Troch. de Rhab. Cappar. Diacurcum. Supra dicta simplicia e vegetabilibus profunt præcipue, si infundantur c. vino, ut inde vinum fiat medicatum. Hæc vina medicata & tutius & melius operari omnibus aliis, illisque maxime hydropem, si modo curari possit, sanari, experientia longa se comperisse scribit *Fel. Plater. opp. pract. T. 3. c. 3. p. 255.* *Bonnettus in not. ad Jenson.* refert, matronam 60 jam annum prætergressam, a juventute ascite laborantem, usu vini talis medicati, infusis laxantibus quandoque interpositis, & hisce per tres hebdomades ita continuatis, epate emollito, & excitato tam largo urinæ profluvio, ut etiam diabetem metueret, convaluisset.

ε) Reliquorum evacuantium per scarificantia, vesicantia & c. usum melius & tutius omittimus ob funestos inde a practicis no-

tatos eventus, quanquam non desint, qui & cum fructu hæc adhibita fuisse memorent. Sic inter alios J. C. *Claudinus de Ingr. ad infirm. l. 2. c. 6. p. 141.* scarificationis feliciter in cruribus tumidis a se administratæ meminit, quæ ordinario alias sphacelum, vel & ulcera hic fere nunquam sanabilia producant. Conf. *Excellent. Archiatr. D. Stahl. præceptor. ætat. devener. in Diss. de ascite.*

§) Denique quoad *Paracentesin* in diversa abeunt autores, nonnullis eandem suadentibus, quibusdam vero plane rejicientibus. Verum circumstantiæ loci, temporis &c. ut in cujuslibet remedii applicatione, sic & hic a prudenti medico respici debent. Equidem rem dubii eventus esse, ob signa incerta loci, ubi aqua hæreat, certum est. Ita, si vesicalis sit ascites v. §. 33. n. 6. infelici cum successu hanc operationem tentari, evidens est, & confirmant id etiam observationes. Brevibus: si unquam hæc operatio locum habet, fieri debet sub morbi initio, juvene & viribus nondum exhausto ægro, visceribus salvis, nec alio morbo perditis, fluido in stagno & in locis v. §. 33. n. 1. & 2. hærente, nondum putrido nec diu ibi existente. Quæ omnes circumstantiæ cum ut plurimum non satis perpensæ fuerint, nec etiam omnia per signa satis cognosci queant, non mirum infausto plerumq; cum successu hanc operationem fuisse institutam. *Regulæ* quomodo operatio ipsa instituenda & *Cautelæ* in hac operatione administranda legantur apud auctores chirurgos v. g. Aquapend. Solingē, Dionis, Palfyn &c.

LXVIII. In genere adhuc notandum, quandoque unum ex hisce evacuationum generibus sufficere, quandoque vero plures conjungi, vel alternari debere pro diversa cujusvis individui & morbi præsentis natura. Successive evacuandum, a lenioribus incipiendo interposita quiete, varianda etiam medicamenta esse, ne æger iis adfuescat, & medicamenta frustra deinde adhibeantur, legibus meth. med. general. conforme, & ex illis notum est.

LXIX. Indicationem secundam v. §. 67. n. 2. ita exequemur, ut *humorum, ut lymphæ &c. spissitudinem* corrigamus attenuantibus, qualia sunt diuretica superius §. 67. lit. [d]. adducta; dein rad. gram. rad. & fol. cichorei, taraxaci, hb. capillares, cuscuta, capill. veneris &c. absinth. cortices ut winteranus, chacarill. cappares &c. hæc omnia vino infusa magis quam alia forma data profunt: porro aromata, mercurialia, mercurius dulcis, præcipitatus ruber &c.

salia

salia alcalina fixa plantarum per incinerationem parata, ut genistæ stipit. fabar. hederæ &c. ex horum cineribus paratâ lixivâ, ut & ex ligno dulcamar. profunt, si vinum tenuë diureticum iis superfundatur. Imprimis myrrha, aloë, iuniperus, cochlearia & antiscorbutica commendanda. Ita meminit *Avus b. m. l. c.* foëminam quandam ex cachectica asciticâ factam, cuius venter fuerit s. ulnarum mensura in amplitudine, & pedes unius ulnæ, aliorum medicamentorum, quæ a variis medicis acceperat, pertasam spiritum juniperi vulgarem hisce simplicibus superfudisse, & bibisse singulis diebus aliquot cochlearia & sic continuando spatio trium mensium plene convaluisse. Abstinent ab omni vini & cerevisiæ potu, vidit eam *Avus b. m.* postea Cliviæ 1665. sanam & incolumem. Hisce referantur etiam *obstructiones* viscerum, ut epatis, lienis &c. minores, & scirrhi incipientes, quorum de reliquo cura ex tractatione propria horum morborum petenda. Qui ascites a morbis prægressis ortus fuit, pro indole istorum morborum tractari debet, adjuncta simul generali methodo hydropem tractandi, qualem præmisimus. *Conf. Archiatr. Excell. D. Stahl. in Diss. de morb. consequ. corrupt. febribus intermitt. turbat. & corruptis, de Tumore oedematoso podagrico & sim.*

LXX. Denique (§. 67. n. 3.) *Debilitas viscerum*, sive sit causa sive ascitis effectus, tollitur roborantibus, martialibus, chalybeatis, salinis junctis v.g. limat. mart. c. aloë in pillul. TRa mart. tartarificata, TRa vitrioli mart. Ludovici, pill. Sylvian. ex vitriolo martis, rhabarbarinis, absinthiacis, ut essent. absinth. Syr. de absinthio, &c. Cort. tamarisci, winterano, chacharillæ, fraxini, Rad. cappar. acetos. gentian. & talibus innumeris. Potest & hic a lenioribus subadstringentibus incipi & ita, si opus videatur, ad fortiora adscendi. Hæc omnia debita dosi & per tempus sufficiens continentur.

Hisce rite adhibitis *Dieta debita* concurrat, ut ita & vitali & præservatoriæ indicationi satisfaciatur. Consistet hæc primo in medicamentis analepticiis v.g. miva cydoniorum &c. *Avus b. m.* Electuar. diacubeb. ad confortand. & exsiccandum perutile reperit; Deinde victus sit initio præprimis ex cibis evpeptis, nec nimia quantitate assumatur, aromatizatus zingibere &c. brevibus: sit siccus, calidus, potus quo parcior, eo conducibilior, vinum bibatur meracum vetus, adstringens, cerevisia sit oleosa pinguis, ut Brunsvic. mumma &c. Corpus sufficienter moveatur, cavendum tamen ab omni vehementiori animi & corporis commotione. Aer sit temperatus, magis tamen ad calidam temperiem inclinans.

Hæc via si non semper tolli, multum tamen hujus morbi sævitiam leniri posse speramus, & ita huic nostræ Dissertationi, quæ præter opinionem crevit, finem imponimus. Meliores meliora dabimus. Summo vero Numini sit pro concessis viribus Laus, Honor, & Gloria in sempiterna Secula.